

Dominicus College ta inaugura Kantine riba Plaza Luis Zievinger

ORANJESTAD(AAN): -- St. Dominicus College (SDC) a celebra inauguracion oficial di su kantine di school Diabierna siman pasa.

E kantine aki ta situa riba e plenchi paden di SDC cu a haya e nomber "Plaza Luis Zievinger", dunando honor na meneer Zievinger (q.e.p.d.) kende a dedica 28 aña di su bida na St. Dominicus College.

E alumnonan por usa e kantine durante pauze y les y tambe durante eventonan di school.

Mapa di e kantine a ser pinta pa Carlos Profet y e lugar a ser construi pa señor De Kort.

Comision di mayor di Dominicus College --lanta den aña escolar 1993-1994-- a traha duro pa por a logra e kantine.

Despues cu maestronan di e school a entrega e comision un lista di proyectonan cu nan lo kier mira realiza, a ripara cu tin un necesidad

grandi di un lugar caminda e muchanan por pasa nan pauze trankil y den sombra.

E comision a organiza bingo, dia di famia, celebracion di ochenta aña di existencia di e school, mercado di purga y a rifa tambe un auto pa lanta fondo pa construcion di cura di school y e kantine.

Morto inespera di meneer Zievinger na 1994 tabata un sla duro pa Dominicus College y pa e comision di mayor, pero a sigui traha na beneficio di e school y e alumnonan.

A dicidi pa inaugura e kantine riba e mes dia cu Dominicus College a celebra Carnaval como cu esaki tabata un fiesta cu señor Zievinger tabata gusta masha.

Den e comision di mayor tin asiento Velma Daal (presidente), Ennio Kelly (vice-presidente), Milagros Posner (secretaris), Freddy Ras (tesorero) y e miembronan

Lisette Hoek, Margareth Quandus, Veronique Bisslik, Elvira Arends, Astrid Hermans, Eugenia Ras y Jacintho Curiel.

RECORDANDO LUIS ZIEVINGER

Crisanto Luis Zievinger a nace como yiu di Ovito Zievinger (q.e.p.d.) y Annie Zievinger-Kelkboom riba 25 di October 1935.

E tabata tin cuatro ruman y tabata yuda su tata cu trabao di carpinte di chikito.

Ultimo aki a hacie un hende hopi habil loke tabata visto durante su lesnan di expresion creativo na school.

Luis tambe a bishita St. Dominicus College cu esten tabata school basico y MULO y djey a bay Hulanda pa studia pa meneer di school na kweekschool (instituto pedagogico) na Oudenbos, Brabant.

El a bolbe Aruba na 1959, ven di animo na traha na su

Pueblo.

Na Mei 1960, el a casa cu Carla Terlep for di cual matrimonio a nace e yiunan Saskia, Ferry, Edward y Ashwin.

Meneer Zievinger a traha na Don Bosco School na San Nicolas, na Pius X School na Dakota (pa dos aña) y di Martinus School, actualmente Colegio Pastoor Kranwinkel na Paradera, di prome di September 1962 te 15 di Februari 1966.

Riba 16 di Februari 1966, el a cuminza traha na Dominicus College unda el a keda te na su morto inespera dia 9 di Augustus 1994.

Meneer Zievinger tabata un maestro di school ehemplar cu tabata activo riba diferente tereno y tabata para cla semper pa yuda su alumnonan y coleganan.

El a pasa hopi atardi riba veld di bala y tereno di school pa train muchanan di St. Dominicus College den un otro ramo di deporte y prueba di su exito ta e tantisima beker y plakaat cu tin den un kashi di glas na school.

Dominicus College tabata e prome school na Aruba cu a gana e Dr. Leito Wisselbeker, danki na e esfuertonan di meneer Zievinger, maestronan di school y mayornan.

Burger King (Florida) a reconoce dia 6 di October 1988 pa su trabao excelente den educacion na Aruba y riba e recuerdo bunita cu el a haya riba e dia aki ta skirbi: "En reconocimiento pa tur locual bo a haci pa nos muchanan y nos futuro".

Ademas di tur cos, meneer Zievinger tabata un genio riba type-writer y hopi ta esnan cu a siña type cerca dje.

No ta di papia mes di e tantisimo skriptie cu el a yega di keda type te ora laat di marduga den su "tikkamer" den cura di cas.

No ta por nada cu zr. Juliette a yame "de man met de gouden vingers" den su ultimo despedida.

Tur hende cu a conoce Luis Zievinger a sa di aprecie como un bon amigo, maestro y colega y St. Dominicus College lo keda corda pa semper.